

आकाशवाणी

खास-खास खबरां

1. प्रधानमंत्री नरेन्द्र मोदी होरें आखेआ ऐ जे रिफ्युजियें गी पूरे संवैधानिक अधिकार हासल होगन ते घुसपैठियें गी बाहर कडुआ जाहगा।
2. राष्ट्रपति-उपराष्ट्रपति ते प्रधानमंत्री होरें अज्ज महात्मा ज्योतिबा फुले हुंदी जयंति पर उनें'गी श्रद्धांजलि अर्पित कीती।
3. 22एं देशें दे प्रतिनिधिमंडलें असम- केरल ते पुद्दुचेरी चुनाएं दौरान भारत दी चुनांs प्रक्रिया दी सराहना कीती।
4. दिल्ली च पंजीकृत 30 लक्ख रुपें तगर दी कीमत आहली इलैक्ट्रिक गड्डियें गी 2030 तोड़ी सिडक कर ते पंजीकरण कराने आहली फीस च 100 फीसद छूट दिती जाहगा।
5. भारत च डिजिटल भुगतान UPI बवस्था दे अज्ज 10 बरे पूरे होई गे ना।
6. ते आयुष शेटी चीन दे झेजियांग च आयोजित एशिया बैडमिंटन चैम्पियनशिप दे मर्दे दे सिंगल्स दे फाइनल च दाखल होई गे ना।

<><><><><><>

PM -Refugees

प्रधानमंत्री ते बी.जे.पी. दे सीनियर लीडर नरेन्द्र मोदी होरें अज्ज जोर देइयै आखेआ ऐ जे रिफ्युजिएं गी पूरे संवैधानिक अधिकार हासल होगन- जिसलै के घुसपैठियें गी बाहर कडुआ जाहगा। अज्ज पच्छिम बंगाल दे कटवा च इक जनसभा गी सम्बोधित करदे होई मोदी होरें आखेआ जे राज्य च भाजपा सरकार बनने दे मगरा सब्बनें योग्य आवेदकें लेई नागरिकता संशोधन कानून तैहत नागरिकता देने दी प्रक्रिया च तेजी औगा। सत्ताधारी तृणमूल कांग्रेस पर सख्त हमला करदे होई मोदी होरें इल्जाम लाया जे ओदे 15एं बरे दे शासन कन्नै बंगाल दे हर इक नागरिक गी डर-त्राह दे इलावा किश नेंई हासल होआ ऐ। उ'नें आखेआ जे भाजपा राज्य च सियासी हिंसा च शामिल लोकें खलाफ सख्त कारवाई रोग। उ'नें गलाया जे घुसपैठियें गी अपने बैग पैक करना शुरू करी देना लोडचदा- कीजे इत्थुआं जाने दा समां होई गेआ ऐ। उ'नें इब्बी आखेआ जे गैर-कनूनी अप्रवासियें दी मदद करने आलें गी बख्शेआ नेंई जाहगा।

<><><><><><>

Jyotiba Phule -Anniversary

समाज सुधारक ते महान जनसेवक महात्मा ज्योतिबा फुले हुंदी जयंति पर अज्ज देशै उनें'गी श्रद्धांजलि अर्पित कीती ऐ। 1827 च अज्जै दे दिन गै जन्मे ज्योतिबा फुले होरें अपनी धर्मपत्नी सावित्री फुले हुंदें कन्नै रलियै महिला शिक्षा ते सशक्तिकरण लेई महत्वपूर्ण कम्म कीते। एहदे कन्नै गै उ'नें जाति बवस्था ते छूआ-छूत जनेही समाजिक बुराइयें गी खत्म करने लेई संघर्ष कीता। राष्ट्रपति द्रौपदी मुर्मू- उपराष्ट्रपति सी.पी. राधाकृष्णन- प्रधानमंत्री नरेन्द्र मोदी- लोकसभा अध्यक्ष ओम बिरला ते होरनें प्रमुख सांसद ते मन्त्रे-परमन्त्रे दे लोक- संसद भवन परिसर च प्रेरणा स्थल पर ज्योतिबा फुले होरें गी पुष्पांजलि अर्पित कीती। इस मौके देसै दे बक्ख-बक्ख हिस्सें च केई कार्यक्रम आयोजित कीते गे।

<><><><><><>

Amit Shah Rally

केन्द्रीय गृहमंत्री ते बी.जे.पी. दे सीनियर लीडर होरें पच्छिम बंगाल दे ओंडा च इक जनसभा गी सम्बोधित कीता। उ'नें आरोप लाया जे तृणमूल कांग्रेस दे सिंडिकेट शासन नै पच्छिम बंगाल गी बर्बाद करी दिता ऐ। उ'नें आखेआ जे पच्छिम बंगाल दे नौजवानें गी राज्य थमां पलायन करने लेई मजबूर होना पवा'रदा ऐ ते करसानें गी उन्दी पैदावार दा सेही मुल्ल नेंई थोआ'रदा ऐ। तोंआई तृणमूल कांग्रेस सुप्रीमो ते पच्छिम बंगाल दी मुखमंत्री ममता बनर्जी होरें होरनें राज्यें च बंगाली भाशी लोकें पर कथित हमलें दे मुद्दे पर भारतीय जनता पार्टी दी नुक्ताचीनी कीती ऐ। उ'नें आरोप लाया जे बी.जे.पी. नै बंगाल गी बंडने दी साजिश रची ऐ।

<><><><><><>

Jaishankar- Mauritius

विदेशमंत्री डाक्टर एस. जयशंकर हुंदी मॉरीशस दी दंडू रोजा यात्रा सम्पन्न होई गेई ऐ। विदेश मंत्रालय दे प्रवक्ता रणधीर जयसवाल होरें सोशल मीडिया दी इक पोस्ट च दस्सेआ जे इस यात्रा दे दौरान सेहत- प्रदूषण मुक्त परिवहन – क्षमता निर्माण- शिक्षा ते बुनियादी ढांचे सनें प्रमुख खेत्तरे च महत्वपूर्ण उपलब्धियां हासल होइयां न। इस दौरे च टिकाऊ ते जन-आधारत सांझीदारी उपपर बी सांझा ध्यान देने पर जोर दिता गेआ।

<><><><><>

Goyal -Saudi Arabia

बन्ज ते बपार मंत्री पीयूष गोयल होरें भरोसा दोआया ऐ जे हाल च गै घोषित कीते गेदे युद्धविराम कन्नै पच्छिम एशिया च स्थायी शांति ते सुरक्षा ब्हाल होई जाहगा। पीयूष गोयल होरें सऊदी अरब दे समकक्ष माजिद बिन अब्दुल्ला अल कासबी हुंदे कन्नै वर्चुअल गल्लबात दौरान एह गल्ल आक्खी। उ'नें बधी दी गड़बड़ी ते अस्थिरता गी दिक्खदे होई आपूर्ति शृंखला गी सुचारु ढंग्गै कन्नै चलाने आस्तै सऊदी दे लोकें दे मज़बूत धेइयै दी सराहना कीती। गोयल होरें मौजूदा संघर्ष दे दौरान सऊदी अरब च होए दे हमलें दी निंदेआ कीती ते भारतीय समुदाय दी सुरक्षा यकीनी बनाने आस्तै सऊदी अरब दे प्रयासें दी सराहना कीती।

<><><><><>

Misri -Paris Visit

विदेश सचिव विक्रम मिसरी कल्लै थमां त्रंडु दिनें दे आधिकारिक दौरे पर पेरिस ते बर्लिन जा करदे न। पेरिस च विदेश सचिव फ्रांस दे विदेश मंत्रालय दे महासचिव मार्टिन ब्रिएन्स हुंदे नै भारत-फ्रांस कार्यालय परामर्श दी सह अध्यक्षता करडन। बैठक च रक्षा- सिविल परमाणु ऊर्जा- अंतरिक्ष- साइबर ते डिजिटल क्षेत्र- आर्टिफिशल इंटेलिजेंस- नमियें काहडे ते सांस्कृतिक संबंधें गी बढ़ावा देने पर चर्चा कीती जाहगा। विदेश मंत्रालय नै आखेआ ऐ जे ताजा वैश्विक ते क्षेत्रीय घटनाएं उपपर बी चर्चा कीती जाहगा। बर्लिन च विदेश सचिव जर्मनी दे राज्य सचिव डाक्टर गेज़ा इंड्रियास वॉन ग्रेयर हुंदे नै भारत-जर्मनी विदेश कार्यालय परामर्श दी सह-अध्यक्षता करडन।

<><><><><>

ECI- Delegates Visit

22एं देशें थमां आए दे अंतराष्ट्रीय प्रतिनिधिमंडलें असम- केरल ते पुद्दुचेरी च होए दे विधानसभा चुनावें दौरान भारत दी चुनावी प्रक्रिया दी सराहना कीती। चुनावें आयोग ECI आस्सेआ आयोजित अंतराष्ट्रीय Election Visitors कार्यक्रम 2026 दे तैहत कोई 38 प्रतिनिधिमंडल दो-रोजा दौरे पर भारत आए दे हे। ECI नै इक ब्यानै च आखेआ ऐ जे सुचारु ढंग्गै कन्नै होए दे चुनावें च मतदाताएं दी मती भागीदारी ने प्रतिनिधिमंडलै पर गैहरी छाप छोड़ी ऐ। ओह मतदान कन्नै बड़े प्रभावत होए न। इनें प्रतिनिधिमंडलें चुनावें प्रबंधन दी व्यापकता गी दिक्खदे होई मौका देने लेई चुनावें आयोग दा आभार व्यक्त कीता ते पारदर्शता समावेशिता ते उत्कृष्टता आस्तै आयोग दी वचनबद्धता दी सराहना कीती।

<><><><><>

Delhi -Electric Cars

राष्ट्रीय राजधानी दिल्ली च पंजीकृत 30 लक्ख रपें जां ओदे शा मती एक्स-शोरेन्स आहली कीमत आहली सबबनें इलैक्ट्रिक कारें गी 31 मार्च 2030 तोड़ी सिडक कर ते पंजीकरण कराने आहले फार्म च 100 फीसद छूट दिती जाहगा। दिल्ली सरकार नै अज्ज 2026 थमां 2030 तगर दी अवधि लेई इलैक्ट्रिक वाहन नीति दा मसौदा जारी कीता ऐ- जेहदा मकसद प्रदूषण मुक्त गड्डियें गी अपनाने च मदाद थ्होग। इस नीति तैहत इलैक्ट्रिक गड्डियें गी बढ़ावा देने लेई 3 ज्हार 9 सौ करोड़ शा मते रपें जारी कीते गे न। प्रदूषण मुक्त पर्यावरण आस्तै इलैक्ट्रिक दो पहिए- त्रौ पहिए ते चौं पहिए आहली गड्डियें दी खरीददारी आस्तै पराने ते प्रदूषण फलाने आहली गड्डियें गी हटाने पर नमी गड्डी दी खरीद पर मते प्रोत्साहन दिते जागंन। नीति च पैहले बरे च 2 इशारिया 25 लक्ख रपें तगर दी कीमत आहली इलैक्ट्रिक दो पहिए आहली गड्डी लेई 10 ज्हार रपें तगर दा प्रोत्साहन देने दा प्रस्ताव ऐ। इलैक्ट्रिक आटो सनेह त्रौ टैरें आहली गड्डियें लेई पैहले बरे च 50 ज्हार रपें थमां लेइयै त्रिये बरे तोड़ी 30 ज्हार रपें तगर दा प्रोत्साहन थ्होग। उआं इलैक्ट्रिक चौं टैरे आली गड्डियें लेई प्रोत्साहन शुरु च इक लक्ख रपें तगर दा होग।

<><><><><>

ISRO -Gaganyaan

भारती अंतरिक्ष अनुसंधान संगठन इसरो नै आंध्र-प्रदेश दे श्रीहरिकोटा च गगनयान मिशन लेई दुआ सफल एकीकृत वायु विस्फोट परीक्षण कीता ऐ। एह प्रणाली मनुख सने अंतरिक्ष डुआरी दे दरान अंतरिक्ष जातरिएं दे कैप्सूल- क्रू मॉड्यूल दी सुरक्षित वापसी जकीनी बनाने लेई जरूरी ऐ। मॉड्यूल दे छोड़े जाने दे बाद 10 पैराशूट आली प्रणाली दा इस्तेमाल कीता गेआ- जेहदे नै कैप्सूल दी रफ्तार गी सुरक्षित पानी दे स्तर धोड़ी हौला करने च मदाद मिली। पैहला कामयाब परीक्षण 24 अगस्त 2025 गी श्री हरिकोटा दे सतीश धवन अंतरिक्ष केन्द्र च होआ हा। एहदे च चिनूक हेलीकाप्टर थमां 4 इशारिया 8 टन दे Dummy Crew Module गी 3 किलोमीटर दी ऊंचाई परा हेठ सुट्टेआ गेआ हा। वायु विस्फोट परीक्षण अंतरिक्ष यान दी धरतै पर वापसी दे अखीरी चरण लेई महत्वपूर्ण ऐ। परीक्षण दे दरान जहाज जां हेलीकाप्टर- अंतरिक्षयान गी इक तय ऊंचाई परा हेठ छोड़दा ऐ। केन्द्री मंत्री डाक्टर जितेन्द्र सिंह होरें इस कामयाब परीक्षण लेई इसरो गी मुबारकबाद दिती ऐ।

<><><><><><>

Sahil Choudhary

केन्द्रीय जांच ब्यूरो (CBI) नै छप्पे दे भगोड़े साहिल चौहान गी थाइलैंड थमां सफलतापूर्वक वापस आहने च कामयाबी हासल कीती ऐ। हरियाणा पुलिस इसी हत्या- हत्या करने दी कोशश च डकैती ते गैर-कनूनी हथियारें दा इस्तमाल करने जनेह मते सारे अपराधिक मामलें च इसी तुप्पा'रदी ही। केन्द्रीय जांच ब्यूरो (CBI) नै दस्सेआ ऐ जे साहिल हरियाणा- पंजाब ते चंडीगढ़ दे इक सक्रिय बूप्पी राणा गिरोह दा मुख् सदस्य ऐ। एजेंसी नै आखेआ ऐ जे हरियाणा पुलिस नै नशीले पदार्थें पर रोकथाम सरबन्धी ब्यूरो यानि Narcotics Control Bureau दे अनुरोध पर साहिल दे खलाफ रैड नोटिस जारी कीता हा। एह कल दिल्ली अंतराष्ट्रीय हवाई अड्डे पर पुज्जा- जित्थुआं हरियाणा पुलिस दी इक टीम नै साहिल गी हिरासत च लेई लैता।

<><><><><><>

ED –Searches

प्रवर्तन निदेशालय यानि ED नै अज्ज पच्छिम बंगाल दे साबका शिक्षा मंत्री पार्थ चटर्जी ते होरनें खलाफ राज्य च कथित शिक्षक भर्थी घोटाले दे मामले च मनी लॉड्रिंग दी जांच दे हिस्से दे तौरा पर नमें सिरेआ छापेमारी कीती ऐ। ED ने SSC भर्थी घोटाले दे सिलसिले च कोलकाता च दंडु थाहरें पर छापेमारी कीती- ED ने आखेआ ऐ जे पार्थ चटर्जी हुंदे घरै ते प्रसन्ना कुमार राय हुंदे दफ्तर च तलाशी लैती गेई- प्रसन्ना कुमार राय इसलै न्यायिक हिरासत च ना।

<><><><><><>

UPI -10 Years

भारत च डिजिटल भुगतान UPI बवस्था दे अज्ज 10 बरे पूरे होई गे ना। पिच्छले इक दाहके च एह भारतीय भुगतान प्रणाली दी रीढ़ बनी गेआ ऐ। भारतीय राष्ट्रीय भुगतान निगम ने बरे 2016 च UPI दी शुरुआत कीती ही- जेहदे जरिए भारत च वित्तीय लेन-देन दे तरीकें च सखाल आई ऐ। बरे 2021 च इस नैटवर्क कन्नै 216 बैंक जुड़े हे- जेहडे हून बधियै जनवरी 2026 तगर 6 सौ 91 बैंक तगर पुज्जी गे ना। वित्त मंत्रालय दे मताबक वैश्विक रियल टाइम पेमेंट प्रणाली दे ट्रांजैक्शन वॉल्यूम च UPI दी तकरीबन 49 फीसद हिस्सेदारी ऐ। अंतराष्ट्रीय मुद्रा कोष ते विश्व बैंक जनेह संस्थानें बी UPI दी व्यापकता दक्षता ते समावेशिता दी सराहना कीती। UPI हून राष्ट्रीय सीमा परां अगो बधदे होई संयुक्त अरब अमीरात- सिंगापुर- भूटान- नेपाल- श्रीलंका- फ्रांस- मॉरीशस ते कतर सनें कई देशें च संचालित होआ'रदा ऐ।

<><><><><><>

Badminton

आयुष शेटी बैडमिंटन एशिया चैम्पियनशिप दे फाइनल च पुज्जी गे ना। आयुष नै सैमिफाइनल च मौजूदा चैम्पियन कुनलावुत वितिदसर्न गी त्रों गेमें च हराइयै घट्टो-घट्टु चांदी दा तगमा पक्का करियै फाइनल च अपनी थाहर बनाई

लैती ऐ। विश्व च नम्बर 25 दे इस खडारी गी- जेहडे पेरिस ओलम्पिक च चांदी दा तगमा जित्तेने आहले विजेता ते 2023 बरे दे विश्व चैम्पियन न- आयुश ने शानदार प्रदर्शन करदे होई वित्तिदसर्न 10-21/21-19 ते 21-17 कन्नै जित्त दर्ज कीती।

<><><><><><>

Haji- JK

जम्मू-कश्मीर थमां तकरीबन 4 हजार 700 श्रद्धालु इस बरें हज यात्रा पर जाने लेई तयार न। इंदे चा तकरीबन 3 हजार 900 श्रद्धालु श्रीनगर थमां रवाना होउन- जिसलै के तकरीबन 1 हजार श्रद्धालु दिल्ली थमां यात्रा करउन। श्रीनगर अंतर्राष्ट्रीय हवाई अड्डे थमां डौआरियां 18 अप्रैल थमां चलाई जाउन। अधिकारिएं इस गल्लै दी तसदीक कीती ऐ जे श्रद्धालुएं लेई सुचारू ते आरामदायक यात्रा यकीनी बनाने लेई सब्बै लोडचदे बंदोबस्त पूरे करी लैते गेदे न। सरबंघत एजेसियें दे तालमेल कन्नै यात्रा- रिहायश ते सहायता सरबंधी स्थूलतां उपलब्ध करोआईयां गेइयां न।

<><><><><><>

Rajouri –Gojri Topi

जिला प्रशासन राजौरी आसेआ दूर-दराज इलाके च रौहने आहलियें बेरोजगार महिलाएं लेई रिवायती गोजरी टोपियें दी सिखलाई सरबंधी केन्द्र दी शुरुआत कीती गेई ऐ। एहदा मकसद महिलाएं गी स्वयं रोजगार लेई कौशल सखाइयै उनेंगी सशक्त बनाना ते रिवायती संस्कृति दी साम्भ-संभाल करना ऐ। इस प्रोग्राम तैहत महिलायें गी 3 महीने दे कोर्स दौरान रिवायती गोजरी टोपियां बनाने दी सिखलाई दिती जाहग। “बेटी बचाओ- बेटी पढ़ाओ” स्कीम तैहत इस सिखलाई अभियान च राजौरी दे दूर-दरेडे इलाकें दियें महिलायें गी इनें टोपियें लेई लोडचदा-कपड़ा ते कढ़ाई आहला समेयान प्रशासन आसेआ मुफ्त मुहैइया कराया जाग।

<><><><><><>

India –Nepal Highway Project

बाराबंकी बहेरच राजमार्ग भारत ते नेपाल बश्कार बपार सरबंधी सरबंधें गी मजबूत करने च अहम भूमिका नभाग। केन्द्रीय मंत्रिमंडल नै हाल च गै राष्ट्रीय राजमार्ग 927 दे चौं लेने आहले बाराबंकी बहेरच सैक्शन दे निर्माण आस्तै मंजूरी देई दिती ऐ। सिडक ट्रांस्पोर्ट ते राजमार्ग मंत्रालय नै आखेआ ऐ जे एह परियोजना रणनीतिक तौरा पर महत्वपूर्ण रुपाईडीहा लैंड पोर्ट ते नेपाल दे कश स्थित नेपालगंज कन्नै राबते गी मते हद तगर बेहतर बनाग। बेहतर सिडक राबते कन्नै बन्ने पर बपार गी बढ़ावा थ्होने- खेत्तरीय आजीविका गी समर्थन हासल होने ते दौनें गुआंडी देशें बश्कार सैहयोग गी बढ़ावा थ्होने दी मेद ऐ।

<><><><><><>

LG- Nasha Muk्त

सरकारै अज्ज समूलचे प्रदेश च 100 दिनें आहली “नशा मुक्त जम्मू-कश्मीर” मुहीम रम्भ कीती। एदा मकसद जम्मू-कश्मीर गी नशीले पदार्थें थमां आज्ञाद करोआना ऐ। इस सरबंधै च एल.जी मनोज सिन्हा होरें अज्ज मौलाना आज्ञाद स्टेडियम थमां इक्क बड्डी पदयात्रा गी सैली झंडी दस्सियै इस मुहीम गी रम्भ करोआया। पदयात्रा च विद्यार्थियें- गैर सरकारी संगठनें- सरकारी अधिकारियें ते सुरक्षाबलें सने होर नेकां लोक शामिल होए। लोकें गी सम्बोधित करदे होई श्री सिन्हा होरें नशे दी कुवैतु गी खत्म करने ते प्रदेश गी नशीले पदार्थें थमां मुक्त बनाने आस्तै रलियै कोश्टां करने पर ज़ोर पाया।

<><><><><><>